



26. august 2014

EM 2014/53

Inatsisartut suleriaasianni § 33 naapertorlugu aalajangiiffigissassatut siunnersuut imaattoq matumuuna saqqummiupparput:

Inatsisartut aalajangiiffigissassaattut siunnersuut Naalakkersuisut peqquneqassasut Nukissiorfiit nalunaarfigissallugu, suliffeqarfiup akit allattorsimaffiani allaqqasut allannqorteqqullugit, siunissami ima allassimalerluni innaallagissamut atuisut nunami aalisakkanik tunisassiorfiit innaallagissamut akikillisaaffigisarai aammalu imermik atuisut nunami aalisakkanik tunisassiorfiit imermik akikillisaaffigisarai, maannakkutut ikkunnaarluni Nuummiunerusut fjernvarme-mik atuisunit.

(Inatsisartunut ilaasortat, Knud Kristiansen aamma Gerhardt Petersen)

Tungavilersuut:

ATASSUT-ip eqqumaniarfigivaa naalakkersuinikkut aaliagiunneqarnikuusoq nunami aalisakkanik tunisassiorfiit innaallagissamik imermillu akikinnerusumik pissarsisinnaanissaat. Tamanna ATASSUT-mit paasilluarsinnaavarput. Kisianni, taamatut akikinnerusumik aalisakkanik tunisassiorfiit innaallagissamik imermillu akikillisaaffigineqartarneri matussuserneqartariaqarput. Taamatut aalisakkanik tunisassiorfiit akikillisaaffigineqartarnerat, tamanna Nukissiorfinni nioqqutit atuisullu assigiinngitsut aqutugalugit tapiissutitut ingerlanneqartarpoq.

ATASSUT-mit takusinnaasimavarput Avatangiisinut Pinngortitamullu Naalakkersuisoqarfiup nassuiaataani Rambøll-imit marsi 2014-mi suliarineqarsimasumi, nunami aalisakkanik tunisassiorfinnut innaallagissamik aamma imermik akikillisaanerit 2012-mi 77 mio. kr. amingartoorfusimasut akilernerqarsimasut pingaarnertut Nuummi fjernvarme-mik atuisut 80 mio. kr. –nik sinneqartoorutaannit.

Nukissiorfiit ukiumoortumik nalunaarutaanni 2012-meersumi, ingerlatseqatigiiffik 218 mio. MWh-mut aki 2014-mut 810 kr-voq (2013-mi 817 kr-simavoq). Tamannalu naatsorsukkanneraanni ukiumut fjernvarme-mit kaavijjaartinneqartut 175 mio. kr. missaaniissapput, tasanilu Nuuk qaffasinnerusumik tapiissuteqartarluni katillugit 80 mio. kr. missaani. Taava imatut paasineqartariaqarpoq Nuummi fjernvarme-mut aki pissusimaminiit marloriaataa sinnerlugu akisuneruvoq.

Taamatut inissisimasoqarnera ATASSUT-mit assut isornartoqartipparput. Kikkunuku Nuummi fjernvarme-mik atuisuusut? Tassaapput inissarsuit Blok 1-miit 10-mut, Radiofjelde, Tuujuk, Nuussuarmi inissiat il.il. Aap, tassalu tassani inissianiillutik, innuttaaqativut aningaasaqarniarnikkut sanngiinnerusut utoqqartavullu. Tamanna eqqarsaammernarpoq. Qaammammut aningaasartuutai malunnaatilimmik appartissinnaangaluarpavut ulluinnarni inuuniarnerat oqilisaatilarlugu siunissamullu qaamanerusumik takunneqqissinnaalersillugit.

Taamaattumik ATASSUT-mit taamatut tapiissuteqartarnerit nikisikkusukkalarpavut fjernvarme-mik atuisuniit innaallagissamut imermullu atuisunut, taamaasilluni nammassinnaalluarnerit



nammatassinneqarnerulerlutik, massakutut Nuummi attartortut sanngiinnerit tamanik akiliisinnagit. ATASSUT-ip qinerpaa innaallagissamik atuisut tamarmiusut nunami aalisakkanik tunisassiornermi innaallagissamik akikillisaaffigineqarneri aamma imermik atuisut tamarmiusut nunami aalisakkanik tunisassiornermi imermik akikillisaaffigineqarneri.

Tassa taamatut tunuliaquteqarluni ATASSUT matumani aalajangiiffigisassatut siunnersuut saqqummiuppaa.

Pisortanut aningaasatigut allaffissornikkullu kingunerisassat:

Soqanngilaq

Namminersorlutik inuussutissarsiuteqartunut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Naatsorsueqqissaarnerit takutissavaat qanoq annertutigisumik inoqutigiit ataasiakkaat sunnerneqassanersut innaallagissamik imermillu atuisut tamarmiusut fjernvarme-mik atuisuinnaangitsut nunami aalisakkanik tunisassiorfiit akikinnerusumik innaallagissamat imermullu akiliuteqartarnerinut.